

# Nuwe Lied Bediening

En Hy het 'n nuwe lied in my mond gegee, 'n lofsang tot eer van onse Elohiem (Ps. 40:4)

E-pos: [kontak@nuwelied.info](mailto:kontak@nuwelied.info)  
Webwerf: <http://www.nuwelied.info>

## Wie Is Jou Rabbi?

In 'n onlangse skrywe wat van die Hebrew Roots Teaching Institute (HRTI) ontvang is, naamlik *HTG's Beit Psak Constitution (2015)*, maak hulle die volgende stelling:

*Believers from the house of Israel, also known as Ephraim or Joseph, who is generally known as 'Messianics', is commanded by the Torah to listen and learn from the House of Judah.*

Ondermeer word Sag. 8:19 tot 23 as bewys hiervoor aangehaal, veral vers 23 waar die profeet Saggaria sê:

*So sê יהיה-Tzva 'ot: 'In daardie dae sal tien man vanuit al die nasies die kleeft van 'n man van Y'hudah vasgryp en sê: "Laat ons saam met julle gaan, want ons het gehoor dat God by julle is. (PWL<sup>1</sup>).*

In hierdie skrywe van die HRTI word ook die volgende stelling gemaak:

*How arrogant of the "church" and "Messianics" to come and pretend they can teach the Jews. No, Scripture has it that the Messianic lost sheep will eventually learn from Judah concerning the Divine Constitution during the Olam Habah. This Divine 'Constitution' is enshrined in the Torah of Israel. Its judicial interpretation has been Divinely mandated to the Tribe of Judah (the Jews and their spiritual leaders of today, the Rabbis).*

Die onmiddelik vraag is of Yeshua met hierdie skrywe ('opdrag') van HRTI sal saamstem? Dit behoort van selfsprekend te wees dat Yeshua nie so iets aan Sy dissipels sal sê nie! Ons kan dit met sekerheid weet, want Yeshua het juis gewaarsku teen die suurdeeg van die Fariseërs (Matt. 16:6 tot 12). En ons weet dat Rabbynse Judaïsme is gebou op die fondament van Fariseïsme. Hierdie suurdeeg van die Fariseërs is hulle leerstellings:

*Toe het hulle verstaan dat Hy nie gesê het dat hulle moes oppas vir die suurdeeg van brood nie, maar vir die leringe van die Fariseërs en Sadduseërs. Matt. 16:12 – PWL.*

Ons kan dus met sekerheid aanvaar dat Yeshua ook vandag aan ons sou sê: *Pasop vir die suurdeeg – die leerstellings – van Rabbynse Judaïsme!* Na wie luister jy? Na die woorde van Yeshua Messias of na die woorde van die HRTI en Rabbynse Judaïsme? Wie is jou Rabbi – jou Leermeester?

Dit is feitlik ondenkbaar dat HRTI verwag dat ons by Rabbynse Judaïsme moet gaan leer terwyl ons weet dat hulle Yeshua as Messias verwerp en dit deel vorm van hulle leerstellings.

<sup>1</sup> PWL Vertaling (Pad van Waarheid tot die Lewe) kan gratis afgelaai word by [www.padwlewe.ch:ofkontakvirGerrieCoetzeebypadwlewe@yahoo.com](http://www.padwlewe.ch:ofkontakvirGerrieCoetzeebypadwlewe@yahoo.com)

Maar veel meer was my verbasing toe ek lees: *How arrogant of the "church" and "Messianics" to come and pretend they can teach the Jews.* Ek sou reken dit is arrogant van Rabbynse Judaïsme om Yeshua as Messias te verwerp! Dit is om in die kring van spotters te sit (Ps.1:1) en om hulle eie geregtigheid op te rig! Soos Paulus kan ons ook die volgende van Rabbynse Judaïsme sê:

*Broeders, die verlange van my hart en die gebed wat ek tot God vir Israel doen, is tot hulle redding. Want ek getuig van hulle dat hulle 'n ywer vir God het, maar sonder kennis. Want omdat hulle die geregtigheid van God nie ken nie en hulle eie geregtigheid probeer oprig, het hulle hul aan die geregtigheid van God nie onderwerp nie. (Rom. 10:1 tot 3).*

Die probleem met talle gelowiges van die Messiaanse Beweging (*Hebrew Roots Movement*) is dat hulle begin om die Skrifte van die nuwe verbond te verwaarloos of om dit (of sommige dele daarvan) te bevraagteken. Daarom is baie geneig om te vergeet wat Yeshua van die Fariseërs gesê het, of om dit nie te beskou as deel van die Skrifte van die nuwe verbond nie. Maar laat ons onself herinner aan Yeshua se woorde:

*Maar wee julle, skrifgeleerdes en Fariseërs, geveinsdes, want julle sluit die koninkryk van die hemele toe voor die mense; want julle gaan self nie in nie, en die wat sou ingaan, laat julle nie toe om in te gaan nie. Wee julle, skrifgeleerdes en Fariseërs, geveinsdes, want julle eet die huise van die weduwees op, en doen vir die skyn lang gebede. Daarom sal julle 'n swaarder oordeel ontvang. Wee julle, skrifgeleerdes en Fariseërs, geveinsdes, want julle trek rond oor see en land om een bekeerling te maak; en as hy dit geword het, maak julle hom 'n kind van die hel, twee maal erger as julle self. Matt. 23:13 tot 15*

*Wee julle, skrifgeleerdes en Fariseërs, geveinsdes, want julle gee tiendes van kruisement en anys en koljander, en die swaarste van die wet laat julle ná: die reg en die barmhartigheid en die trou. Hierdie dinge behoort julle te doen sonder om die ander na te laat. Matt.23:23*

*Wee julle, skrifgeleerdes en Fariseërs, geveinsdes, want julle maak die buitekant van die beker en die skottel skoon, maar binnekant is dit vol roof en onmatigheid. Matt. 23:25*

*Wee julle, skrifgeleerdes en Fariseërs, geveinsdes, want julle is net soos gewitte grafte wat van buite wel fraai lyk, maar van binne vol doodsbene en allerhande onreinheid is. Matt. 23:27*

*Wee julle, skrifgeleerdes en Fariseërs, geveinsdes, want julle bou die grafte van die profete en versier die grafstene van die regverdiges; Matt. 23:29.*

*Yeshua sê vir hulle (die Fariseërs): "As God julle Vader was, sou julle My liefhê, want Ek het van God af uitgegaan, want Ek het ook nie uit My eie plesier gekom nie, maar Hy het My gestuur. Waarom verstaan julle nie wat Ek sê nie? Omdat julle nie My boodskap kan hoor nie. Julle is van julle vader, die teëstander, en julle begeer om julle vader se wil te doen. Hy is 'n moordenaar van die begin af en staan nie in die waarheid nie omdat daar geen waarheid in hom is nie. Wanneer hy lieg, praat hy uit wat syne is, want hy is vanuit valsheid en die vader daarvan, maar julle vertrou nie in My nie, Ek, wat die waarheid praat. Wie van julle kan My oortuig van sonde? As Ek die waarheid praat, waarom vertrou julle My nie? Wie ook al van God is, luister na die woorde van God; daarom luister julle nie omdat julle nie van God is nie." Joh. 8:42 tot 47 – PWL.*

Selfs Johannes was openlik oor sy siening van die Fariseërs en Sadduseërs soos geskryf is in Matt. 3:7.

*Maar toe hy baie van die Fariseërs en Sadduseërs na sy doop sien kom, sê hy vir hulle: Addergeslag, wie het julle aangewys om te vlug vir die toorn wat aan kom is? Matt. 3:7*

Al bogenoemde woorde van Yeshua, asook die van Johannes, is genoeg rede vir elkeen wat glo in Yeshua as die Messias om nie Rabbynse Judaïsme as leermeester te beskou nie. Yeshua het ons gewaarsku dat die Leerstellings van die Fariseërs, en dus van Rabbynse Judaïsme, suurdeeg is wat verwyder moet word.

Baie roem op hulle kennis van die leringe van Rabbynse Judaïsme, maar laat ons ook in die verband Paulus se woorde onthou:

*Julle roem is nie mooi nie. Weet julle nie dat 'n bietjie suurdeeg die hele deeg suur maak nie?*  
1 Kor. 5:6.

*Laat ons dan feesvier, nie met die ou suurdeeg of met die suurdeeg van ondeug en boosheid nie, maar met die ongesuurde brode van reinheid en waarheid.* 1 Kor. 5:8

Beteken dit dat ons alles van Rabbynse Judaïsme moet verwerp? Nee, maar ons moet met baie groot versigtigheid die vis van die grate skei. Onthou egter:

- ❖ Dit is maklik om die vis van die grate te skei wanneer ons snoek eet, maar dit is baie moeilik om die vis van die grate te skei wanneer ons sardientjies eet! Dan eet ons die sardientjie met grate en al! Is dit nie die klein bietjie suurdeeg wat die hele deeg suur kan maak nie?
- ❖ Net soos die Christendom 'n mengsel van leuens en waarheid is, so ook is Rabbynse Judaïsme.
- ❖ Rabbynse Judaïsme het al tweeduisend jaar gelede gekies om te glo dat Yeshua nie die Messias is nie, of anders gestel, dat YHVH nie 'n Seun het nie. Dit is die groot probleem waarmee ons sit indien ons glo dat hulle ons leermeesters van Torah is! Onthou: Rabbynse Judaïsme verkondig, net soos die Christendom, 'n halwe waarheid!

In die skrywe van HRTI word Gen. 49:1 ook gebruik as bevestiging dat *Judah (the Jews) would retain the ruling legal authority amongst the Twelve Tribes of Israel "... UNTIL Shiloh (Y'shua Messiah) physically comes to earth," to whom the ruling authority "over the nations" belongs.* Wat HRTI skynbaar nie verstaan nie, is dat Yeshua het gekom om 'n hemelse koninkryk te vestig wat met Sy wederkoms fisies sal manifesteer.

Silo (Yeshua) het gekom en die Koninkryk van die Hemel se Melgisedek Priesterorde is herstel. Yeshua is nou die Wetgewer (Koning) met Sy wette wat geopenbaar is in die Nuwe Verbond, naamlik die Torah van die Messias. Hy is ons Ewige Hoofpriester volgens die orde van Melgisedek.

*As daar dus volledige afhandeling deur die Levitiese priesterskap was, waardeur die geskrewe wet vir die mense vasgestel is, waarom was dit nog nodig dat 'n ander nie-Levitiese priester moes opstaan, volgens die beeld van Malki-Tzedek? Sê dit dat Hy volgens die beeld van Aharon sal wees?*

*Net soos daar 'n verandering in die priesterskap gekom het, net so was daar 'n verandering in die reëls,*

want Hy van Wie hierdie dinge gesê word, behoort aan 'n ander stam, waaruit niemand nog ooit by die altaar bedien het nie,  
 want dit is bekend dat ons Meester vanuit Y'hudah opgegroeï het; 'n stam waarvan Moshe niks aangaande die priesterskap gesê het nie.  
 Nog baie duideliker is dit: dat hy sê dat 'n ander nie-Levitiese Priester volgens die beeld van Malki-Tzedek opstaan.  
 Hy wat dit nie was volgens die wet van opdragte, na die liggaamlike, nie, maar deur die krag van lewe wat nie vernietig word nie,  
 want Hy getuig aangaande Hom: "U is nie-Levitiese Priester vir ewig volgens die beeld van Malki-Tzedek,"  
 want daar was eers 'n verandering aan die orde weens die onvermoë daarvan en dat daar geen voordeel in was nie,  
 want die geskrewe wet het niks tot sy einddoel gebring nie, maar 'n versekerde verwagting het in sy plek ingekom, waarin ons tot God nader, wat beter is as dit. Heb. 7:11 tot 19 – PWL.

Ons is 'n koninklike priesterdom en ons staan nie onder die gesag van die Levitiese priesterorde nie! Volgens die brief aan die Hebreërs het daar 'n verandering in die wet (Torah) gekom, naamlik in die priesterorde en die offerandes. Onthou: Die beplande tempel wat waarskynlik binnekort gebou gaan word gaan 'n levitiese priesterorde weer instel. Elkeen sal dan moet kies tussen die Melgisedek priesterorde en die Levitiese priesterorde. Wat gaan jy kies? Maar jy moet nou reeds jou keuse maak!!

HRTI se gebruik van Sag. 8:19 tot 23 as bewys, getuig ook van hulle geestelike blindheid. Lees aandagtig wat is geskryf in verse 20 tot 23 en veral vers 23.

So sê יהוה-Tzva 'ot: 'Volke sal kom, die inwoners van baie stede.  
 Die inwoners van een sal gaan na 'n ander en sê: "Laat ons dadelik gaan om die onverdiende guns van יהוה te vra en om יהוה-Tzva 'ot te soek; ek sal ook gaan!"  
 So sal baie volke en magtige nasies kom om יהוה-Tzva 'ot in Yerushalayim te soek en om die onverdiende guns van יהוה af te smeek.'  
 So sê יהוה-Tzva 'ot: **In daardie dae** sal tien man vanuit al die nasies **die kleed van 'n man van Y'hudah** vasgryp en sê: "Laat ons saam met julle gaan, want ons het gehoor dat God by julle is."

Hierdie profesie is reeds vervul! Let op dat vers 23 verwys na **daardie dae**! Dit verwys na daardie dae wat 'n man (enkelvoud) uit die die stam van Juda te voorskyn sal kom. Daardie man is Yeshua wat uit die stam van Juda gekom het en Sy kleed van geregtigheid is deur tien man, naamlik mense uit verskillende volke, vasgeryp. Ons leef huidig in daardie dae!!

Die International Standard Version vertaal dit soos volg:

*This is what the LORD of the Heavenly Armies says: "In the future, ten men speaking all the languages of the nations will grab hold of one Jewish person by the hem of his garment and say, 'Let us go up to Jerusalem with you, because we heard that God is with you.'"*

Figuurlik gesproke het Yeshua se dissipels Sy kleed 'vasgeryp' en Hom gevolg, en letterlik was daar diegene wat Yeshua se kleed aangeraak ('vasgeryp') en Hom gevolg het vir hul genesing.

*En daar het 'n vrou wat twaalf jaar lank aan bloedvloeiing gely het, van agter gekom en die soom van sy kleed aangeraak. Want sy het by haarself gesê: As ek maar net sy kleed kan aanraak, sal ek gesond word. Matt. 9:20 en 21.*

*en hulle het Hom gesmeek dat hulle net maar die soom van sy kleed mag aanraak; en almal wat dit aangeraak het, het gesond geword. Matt. 14:36.*

Die geskiedenis van Josef en sy broers is ook 'n sinnebeeld dat dit die huis van Juda is wat voor die huis van Josef (Efraim) sal buig. Dit is Juda wat Josef verkoop het en so ook het die huis van Juda vir Yeshua 'verkoop'. Juda het sy vader Jakob se geliefde seun Josef verwerp en so het Rabbynse Judaïsme ook YHVH se Seun verwerp. Hierdie sinnebeeld word ook in die Skrifte van die nuwe verbond herhaal. In haar artikel 'Jona: Duif' ([JONA \(Duif\) 2015.2](#)) verduidelik Ina van Niekerk dit soos volg:

*In Matt. 27:16 – 26 en ooreenstemmende plekke in die ander evangelies lees ons van Barabbas.*

*Dis "Bar Abbas". Seun (bar) van die vader (Abba-s), maar watter vader?*

*BarAbbas was 'n gevangene omdat hy 'n dief en 'n moordenaar was (Joh. 18:40, Mark. 15:7, Luk. 23:18). Hy was dus vanaf die duiwel as vader (Joh. 8:44).*

*Aan die ander kant is daar JaHUsha die Messias wat vanaf Sy Vader kom. Hy en die Vader is een.*

*Sy Vader was JaHUaH (Joh. 5:43, Joh. 17:1 - 26). JaHUsha het met Sy Vader gepraat toe Hy op die folterpaal was (Luk. 23:34, Luk. 23:46).*

*Die naam "BarAbbas" hier in Matt. 27 het **gesinspeel** op diegene wat **Satan**, die Anti-Messias, **as hulle vader sou kies**, soos hulle "BarAbbas" hier gekies het.*

*Toe hulle gevra word wie **losgelaat** moet word, "BarAbbas" of JaHUsha (Matt. 27:19), het hulle uitgeroep: "BarAbbas".*

*Tydens Jom Kippur word daar die lot gewerp tussen twee bokke (Lev. 16:8 – 10). Die een bok word geoffer as sondoffer vir ons sondes (Jes. 53, Rom. 4:25).*

*Dit het gedui op JaHUsha en die dood wat Hy sou sterf ter wille van ons sondes.*

*Die ander bok, die sondebok, **Asasel**, word dan **losgelaat** in die woestyn. Net soos wat **BarAbbas" hier **losgelaat** is!***

*In die boek van Henog lees ons van Azazel (Henog 54,55). Hy word as Satan uitgebeeld. Asasel, die sondebok, is Satan.*

*Dieselfde patroon word gegee in Lev. 14:4 -7 met twee duiwe. Een word geslag, en een word vrygelaat.*

*Daar is egter 'n sinspeling met name op hierdie kritieke tyd tweeduisend jaar gelede, waar daar gekies moes word deur die mense. BarAbbas of Messias JaHUsha.*

*BarAbbas, Asasel, het sy volgelinge, naamlik **diegene wat nie die Messias kies nie**, maar wat JaHUsha as Messias weereens "**dood**" verklaar.*

*BarAbbas was soos 'n politieke leier van sy tyd en het hulle bevryding van die Romeinse juk belowe. Hulle het nie 'n lydende Messias verwag soos wat JaHUsha was nie.*

*Maar tog het ander Jode soos Sy disspels JaHUsha gevolg as hulle groot Hoë Priester in die Orde van Melgisèdek.*

*Dit is "Silo" (Shilo) wat gekom het (Gen. 49:10), die Koninkryk van die Hemel se Priesterorde wat herstel is, en Hy is nou die Wetgewer met Sy wette wat geopenbaar is in die Brit Chadashah, naamlik die Torah van die Messias.*

*Diegene wat Hom gekies het, het afstand gedoen van enige Judaïsme. Dis **daar** waar die **skeiding** al gekom het!*

*BarAbbas die moordenaar, is vrygelaat en JaHUsha wat onskuldig was, is wat hulle betref, vermoor.*

*Hand. 3:14 "En julle het die Afgesonderde en Regverdige verloën en gevra dat 'n moordenaar aan julle geskenk word."*

Hoewel HRTI skryf dat *there is nothing wrong with the Oral Law but it must and can never contradict or supersede the Written Law (Torah)*, en ek hiermee kan saamstem, moet ons wel die volgende vraag vra: Hoe verwag HRTI dat geestelike babas hierdie onderskeid moet kan maak? 'n Geestelike baba sal eet wat hy gevoer word, veral as hy regtig honger is! Daarom:

### **Geestelike babas wat by Rabbynse Judaïsme leer is 'leeukos'!!**

Die saad wat Rabbynse Judaïsme saai is in vele opsigte die onkruid wat gesaai word terwyl die mense slaap (Matt. 13:24 tot 30)! Die woord vir *onkruid* in Grieks beteken *drabok*. Hierdie plant lyk tydens die groeistadium net soos koring, en dit is slegs die kundiges wat die ware koring van die drabok kan onderskei. Drabok is dus vals koring, en dit bevat ook 'n susmiddel wat mense goed laat voel. Rabbynse Judaïsme laat mense ook geestelik 'goed voel' en dit is die gevaar wat elkeen moet besef! Maar onthou:

*Bedrieglik en ernstig siek is die verstand, wil en emosie bo alle dinge; wie kan dit verstaan?  
Ek, יהיה, deursoek die verstand, wil en emosie, Ek toets die gedagtes, om aan elkeen te gee  
volgens sy lewenswyse, volgens die vrug van sy dade. Jer. 17:9 en 10 – PWL.*

**Daarom: Volg Rabbi Yeshua en leer by Hom met die hulp van die Afgesonderde Gees en vermy die die suurdeeg van Rabbynse Judaïsme – of wees minstens ernstig bewus van die gevare daarvan!**

***"Let op na en wees versigtig vir die suurdeeg van die Fariseërs en Sadduseërs."***  
*Hulle het dit onder mekaar bespreek en gesê: "Dit is omdat ons geen brood gebring het nie,"  
maar Yeshua het dit geweet en vir hulle gesê: "Kleintjies in vertrouwe, wat bespreek julle  
onder mekaar dat julle geen brood gebring het nie?  
Verstaan julle tot nou toe nog nie en onthou julle ook nie die vyf brode en die vyf duisend en  
hoeveel groot mandjiesvol julle opgetel het nie?  
Ook nie die sewe brode van die vier duisend en hoeveel ronde mandjiesvol julle opgetel het  
nie?  
Hoe is dit dat julle nie verstaan dat Ek nie oor brood met julle gepraat het nie, maar om op  
te pas vir die suurdeeg van die Fariseërs en Sadduseërs?"*

***Toe het hulle verstaan dat Hy nie gesê het dat hulle moes oppas vir die suurdeeg van brood nie, maar vir die leringe van die Fariseërs en Sadduseërs. Matt. 16:6 tot 12 – PWL.***

-0-0-0-0-0-0-0-0-

*Ontvang YHVH se Woord met welwillendheid, maar ondersoek self die Skrifte of hierdie dinge die waarheid is (Hand. 17:11).*

Shalomgroete.  
Johan.

**E-pos:** [kontak@nuwelielied.info](mailto:kontak@nuwelielied.info)

**Webwerf:** <http://www.nuwelielied.info>

*Kopieë mag gemaak en gratis versprei word, maar mag nie verkoop word nie. Geen veranderinge mag aan die oorspronklike teks aangebring word en dit dan onder die naam van Nuwe Lied Bediening versprei nie.*